

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. प्रधानमंत्री नरेन्द्र मोदी होरें आखेआ ऐ जे संस्कृति, खान-पान ते क्रिकेट भारत ते गुयाना गी जोड़ना ऐ।
2. मुख्यमंत्री उमर अब्दुल्ला होरें पुंछ च विकास कम्में दा जायजा लैता। उनें पूरे पराते विकास दा भरोसा दोआया। मुख्यमंत्री होरें केई सारे प्रतिनिधि मंडलें कन्नै मलाटी कीती ते समस्याएं दे फौरी हल दा भरोसा दोआया।
3. राष्ट्रीय जांच अजेंसी एनआईए नै जम्मू ते कश्मीर दे 5एं जिलें च आतंकवादिएं दी घुसपैठ ते सुरक्षाबलें ते नागरिकें पर होए दे हालिया आतंकी हमलें दी पच्छोकड़े च छापेमारी कीती।
4. बपार कारोबार गी बढ़ावा देने सरबंधी संगठन जेकेटीपीओ नै स्कास्ट जम्मू कन्नै रलियै बासमती चौलें बारे बासमती फ़ैस्ट-2024 दा सरिस्ता कीता।

<><><><><><>

PM-Gayana

प्रधानमंत्री नरेन्द्र मोदी होरें आखेआ जे संस्कृति, खान-पान ते क्रिकेट भारत ते गुयाना गी मजबूती कन्नै जोड़दे न। गुयाना दी राजधानी जॉर्ज टाउन च भारतीयें गी संबोधत करदे होई प्रधानमंत्री होरें आखेआ जे एह समानताएं ते सांझा दृष्टिकोण दौनें मुख्खें दे सरबंधें गी मजबूत करदे न। उनें गुयाना दे विकास च भारतीयें दे योगदान दी सराहना कीती। उनें आखेआ जे पिछले दहाके च भारत दी तरक्की व्यापक ते टिकाऊ रेही ऐ। उनें आखेआ जे भारत तौले गै त्रीह सब्बने शा बड़्डी अर्थबवस्था बनी जाग। प्रधानमंत्री मोदी होरें आखेआ जे समावेशी समाज दे निर्माण आस्तै लोकतंत्र सब्बने शा बड़्डा साधन ऐ। कल संजा गुयाना दी संसद दे विशेष सत्र गी संबोधत करदे होई प्रधानमंत्री होरें आखेआ जे दुनिया दे सामने अगगे बधने लेई सब्बने कोला मजबूत मंत्र ऐ “लोकतंत्र पैहले मनुक्खता पैहले”। उनें आखेआ जे लोकतंत्र साढ़े डीएनए साब्वै बिजन ते साढ़े आचारण च ऐ। प्रधानमंत्री होरें आखेआ जे दुनिया दे कुसै बी मुख्खे दे संकट दरान भारत दे निष्ठापूर्ण जतन सब्बने शा अगगे होंगन ते सब्बने शा पैहले मदाद लेई अपना हथ्य बधाग। उनें आखेआ जे भारत ते गुयाना बश्कार विशेष सरबंध न। 180 ब'रे पैहले इक भारतीय सब्बने शा पैहले गुयाना आया ते ओह्दे बाद थमां गै भारत ते गुयाना बश्कार म्हेशां गै नेड़मे रेह न। श्री मोदी होरें आखेआ जे गुयाना च भारतीयें दी पुज्ज कन्नै

सरबंधत स्मारक इनें नेड़मे सरबंध दा प्रतीक ऐ। प्रधानमंत्री होरें आखेआ जे गुयाना नै उनेंगी देश दे सर्वोच्च सम्मान कन्नै सम्मानित कीता ते एह्दे लेई ओह् गुयाना दे सब्बने नागरिकें दे अभारी न।

<><><><><><>

CM Abdullah

मुख्यमंत्री उमर अब्दुल्ला होरें पुंछ जिले दा व्यापक दौरा लाइयै उत्थें जारी विकास कम्में दा जायजा लैता। मुख्यमंत्री दे तौर पर कम्मकाज सांभने मगरा एह् उंदा पुंछ दा पैह्ला दौरा हा। पुंछ दे डिप्टी कमीशनर होरें कैपेक्स प्रोलेक्टें ते होरने मैह्कमे दी प्रगति बारे व्यापक जानकारी दित्ती। मुख्यमंत्री होरें प्रोजेक्टें गी मित्थे गेदे समें अंदर पूरा करने पर जोर पाया। एह्दे कन्नो कन्नी उनें कम्में दी गुणवत्ता ते ओह्दे म्यार गी बनाई रखने लेई बी गलाया। बैठक दरान हवेली थमां विधायक एजाज जान ते सुरनकोट थमां विधायक चौधरी अक्रम होरें केई सारे लोक हित आले मामले पुट्टे गेदे च शिड़क राबता, सेहत सरबन्धी दिक्खभाल, शिक्षा ते बिजली सरबन्धी ढांचा शामिल हा। इस दरान मुख्यमंत्री हुंदे कन्नै केई सारे प्रतिनिधिएं जेह्दे च बपार मंडल, धार्मिक नेता, सिविल सोसायटी दे संगठनें, साबका फौजिएं बॉर एसोसिएशन, समाजी कार्यकर्ता ते खडारी शामिल हे, उनें मुख्यमंत्री हुंदे कन्नै मलाटी कीती। इनें सब्बने अपने अपने मामलें ते मंगां उंदे अगगे रखियां। मुख्यमंत्री होरें सब्बने जायज मसलें दा हल करोआने दा भरोसा दोआया। दौरे दरान मुख्यमंत्री होरें पीडब्ल्यूडी, स्कूली शिक्षा, पशु पालन ते जल जीवन मिशन ते होरने मैह्कमे दे सबूरे होई चुके दे प्रोजेक्टें दा वर्चुअल माध्यम राएं उद्घाटन कीता।

<><><><><><>

NIA

राष्ट्रीय जांच अजेंसी एनआईए नै जम्मू ते कश्मीर दे 5एं जिलें च कल छापेमारी कीती। एह् छापेमारी आतंकवादी घुसपैठ ते हाल च सुरक्षाबलें ते नागरिकें पर होए दे हमलें दे सरबन्धै च ही। एह् छापेमारी रियासी, उधमपुर, डोडा, रामबन ते किश्तवाड़ जिलें दी 8एं थाहरें पर कीती गई। एनआईए मूजब इस छापेमारी दरान प्रतिबंधित आतंकवादी संगठनें ते आतंकवादी संगठन थमां बाहर रेइयै कम्म करने आले ओवर ग्राउंड वर्करें बश्कार राबता ते होर दुए समेयान बरामद होआ। इस दरान हाइब्रिड आतंकवादिएं दी थाहरें पर बी छापेमारी कीती गई।

<><><><><><>

Ramban

दस्तकारी विभाग, रामबन लोकें गी मती सरकारी स्कीमें बारे जानकारी देने च लग्गे दा ऐ जेह्दे करी उनेंगी रोजगार दे होर मौके मिली सकन। कारखानदार स्कीम बी इंदे च इक ऐ जेह्डी के कौशल विकास दी राएं लोकें गी सशक्त बनांदी ऐ ते उंदी आर्थिक आत्मनिर्भरता बधांदी ऐ। उद्योग ते वाणिज्य विभाग तरफा शुरू इक स्कीम गी दस्तकारी ते हथखड्डी निदेशालय जम्मू कश्मीर सरकार लागू कीता गेआ ऐ। इस स्कीम तैह्त् मेधावी सखेत्रां गी तालियै उनेंगी कौशल दे खरे मते विकास आस्तै अग्गे बी प्रशिक्षण दित्ता गेआ ऐ। कारखानादार गी 25 ज्हार रपे प्रति बैच साहब्बे पैसे दित्ते जांगन। सखेत्रां गी अगले 6 म्हीने जोड़ी हर म्हीने 2 ज्हार रपे बी दित्ते जांगन। कारीगिरें गी विभाग तरफा क्रेडिट कार्ड स्कीम तैह्त् सब्सिडी पर लोन बी दित्ते जा'रदे न। हाल च गै 2 दस्तकारें कारखानादार दे तौर पर रामबन जिले दे 1 बनिहाल थमां पंजीकृत कीता गेआ हा। आकाशवाणी कन्नै गल्लबात करदे होई सहायक निदेशक, दस्तकारी ते हथखड्डी विभाग रामबन तरुण सूदन होरें दस्सेआ.

<><><><><><>

DM Doda

जिला मैजिस्ट्रेट डोडा हरविंदर सिंह होरें डीसी दफ्तर च इक बैठक दी अध्यक्षता कीती जेह्दे च महत्वपूर्ण आधारभूत परियोजनाएं दे सुरक्षा आडिट कराने बारे चर्चा कीती गई। बैठक च लेते गेदे महत्वपूर्ण फैसले च सीसीटीवी कंट्रोल रूम स्थापत करना, सरबंधत वीडियो डाटा गेटवे गी तैनात करना ते एसओजी दा रणनीति साह्बै तैनाती ऐ। हरविंदर सिंह होरें महत्वपूर्ण परियोजनाएं दी सुरक्षा पक्की करने आस्तै इकजुट कोशशें दी जरूरत पर जोर पाया। उनें सारे हितधारकें गी आदेश दित्ते जे सारे तैह् कीते बे तरीकें गी सेई ढंगै कन्नै च आंदा जाए।

<><><><><><>

Medical Camp

उधमपुर जिले दे धर्मथल इलाके च सिविक एक्शन प्रोग्राम तैह्त् सीआरपीएफ दी 127 बटालियन आस्सेआ मुफ्त मैडिकल शिविर लाया गेआ। बटालियन दे कमांडेंट मनोज कुमार होरें होरने दुए अफसरें, साबका पंच, साबका सरपंच दी मजूदगी च उद्घाटन कीता। समरोली, लाद्दा, गंदवाल ते होरने पंचेतें दे 4 सौ लोकें दी मुफ्त जांच कीती गई।

<><><><><><>

Menshural Hygiene Reasi

नौजवान कुड़िएं गी सशक्त करने ते उंदे शैल भविक्ख आस्तै कम्म करने दी वचनबद्धता दस्सदे होई समाज कल्याण विभाग रियासी ने बेटह बचाओ बेटी पढ़ाओ स्कीम हेठ लोकें तोड़ी पुज्ज बनाने आस्तै इक कार्यक्रम दा आयोजन गौरमेंट मिडल स्कूल शेरपुर रियासी च कीता। इस कार्यक्रम च जिला समाज कल्याण अधिकारी सचिन शर्मा होरें 41 स्कूली बच्चें, 15 हाईजिन किटां किशोरियां गी दित्तियां। डीएसडब्ल्यूओ होरें माहवारी दे समे साफ सफाई रखने दी महत्वत्ता बारे दस्सेआ। उनें समाज च पसरा दे नशाखोरिएं दे खतरे बारे जागरूक कीता ते छात्रें दा आह्वान कीता जे ओ समाज थमां नशे दी बुराई गी दूर करने आस्तै दूत बनियां। उनें छात्रें गी शारीरिक ते जहनी विकास ताई खेड्डें च हिस्सा लैने आस्तै प्रेरित बी कीता।

<><><><><><>

Basmati Fest

ब्यार करोबार गी बढ़ावा देने सरबंधी जम्मू कश्मीर संगठन शोरे कश्मीर कृषि विज्ञान ते तकनीक विश्वविद्यालय स्कास्ट जम्मू आस्सेआ आयोजित बासमती फ़ैस्ट 2024 कल स्कास्ट जम्मू च लगा। इक कार्यक्रम च अपनी गुणवत्ता आस्तै पूरी दुनिया च मशहूर बासमती चौलें दी बिरली पंछान ते उंदी राईबाई ते बपार च विकास ते बाद्धा आनने आस्तै चर्चा कीती गई। उद्योग ते बपार मैहकमे दे आयुक्त सचिव विक्रम सिंह होरें उद्घाटन समारोह च बासमती चौलें आस्तै जैविक प्रमाणता दी महत्वत्ता पर जोर पाया जेह्दे करी ओ वैश्विक स्तर पर अपनी पंछान बनाई सकै। उनें अपने विभाग दे कम्में बारे दस्सदे होई प्रस्ताह दित्ता जे इक जिला इक उत्पाद, मुहिम आला लेखा जम्मू कश्मीर ते अपने उत्पादें दे प्रचार आस्तै इक सालाना कलेंछर बनाया जाना चाहिदा।

<><><><><><>

GMC Udhampur(byte)

गौरमेंट मैडिकल कालेज उधमपुर च कल इक सांस्कृतिक कार्यक्रमउद्यम 2024 दा आयोजन कीता गेआ जेह्दे च डाक्टरी दी पढ़ाई करने आले छात्रें, अध्यापकें, वरिष्ठ डाक्टरें, रैसिडेंट ते पैरामैडिकल अमले नै हिस्सा लैता। प्रिंसिपल जीएमसी, उधमपुर डॉ. मृत्युन्जय ते मैडिकल सुप्रीटेंडेंट डॉ. संजय के. शर्मा होरें द्वीप प्रज्वलित करियै कार्यक्रम दा शुभारंभ कीता। प्रशासनिक सचिव, सेहत ते मैडिकल शिक्षा विभाग होरें किट्ठ गी संबोधत करदे होई आखेआ जे छात्रें आस्तै जिंदगी दे इस दौर दी बड़ी महत्वत्ता ऐ ते उनेंगी शैल डाक्टर बनना चाहिदा। उनें भरोसा दोआया जे जीएमसी उधमपुर च अगगे चलयै होर सुविधा उपलब्ध करोआई जाग।

<><><><><><>

Panchayat Raj Director

पंचैती राज मैह्कमे दे निदेशक शाम लाल होरें कल आर.एस.पुरा दा व्यापक दौरा लाया ते उत्थें चला'रदे निर्माण ते ढांचागत विकास प्रोजेक्ट दी प्रगति दा जायजा लैता। उनें उत्थें ब्लाक विकास कौंसल दी इमारत ते सिखलाई सरबन्धी आईईटीसी जायजा लैता।

<><><><><><>